

# HUTBA JUMMAH

HADHRAT MUHYI-UD-DIN AL-KHALIFATULLAH

*Munir Ahmad Azim*

11 Novembre 2016

(10 Safar 1438 Hijri)

**(Résumé Khutba)**

**Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hazrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite cause lor le sujet de "Valeur de la Vie":**

L'existence de l'homme li pas du tout ene hasard. So présence lor la terre non plus li pas sans but. So création c'est ene décret divine pour bane buts bien précis. Sans aucaine doute, et sans exagération, l'homme (la race humaine) li le seul créature ki Allah le Suprême Créateur fine préféré lor tous les reste de la création. **« Nous fine donne l'honneur à bane zenfants Adam, et Nous fine transporte zot lor la terre et la mer. Nous fine fourni zot bane bon kitchose, et Nous fine accorde zot plisse de faveurs ki à beaucoup Nous les autres créatures. »** (Al-Isra 17: 71).

So supériorité lor bane les autres créatures manifesté dans différents façons: Allah fine accorde li le libre arbitre, et Allah fine donne li ene l'esprit ki permette li pou fer la différence entre le bien et le mal. Ensuite, li possède ene l'âme, ki Allah fine créé et ki Li (Allah) fine ordonne à bane anges Pou soufflé dans so lécorps pou faire li vine humain, pou faire li vine dimoune. Allah fine faire So propre éloge dans So Livre Béni (Quran Shareef), kan Li fine décrire bane phases de la création de l'homme: **« Nous fine créer la race dimoune avec ene extrait la terre mouillée. Après sa, Nous fine place li comme ene goutte sperme dans ene réposoir en sécurité. Ensuite Nous fine faire le sperme coller et Nous fine faire sa boute collé là vine ene morceau (la chair) et Nous fine couvert les z'os là avec la chair. Et Nous fine produire ene l'autre créature avec sa. Gloire à Allah ! Allah Li-même meilleur Créateur! »** (Al-Mu'minuun 23: 13-15).

Par conséquent, l'homme bizin reconnaître so propre valeur et so supériorité (ki Allah fine donne li) lor tous bane les autres créatures. L'homme li ene élu (d'Allah) ki pas ena so pareil. So l'âme, de même ki so lé corps, tous sa là c'est ene faveur d'Allah, le Grand

Créateur, et tous sa c'est en vérité ene bien grand et zoli don ki Allah fine fer lor li. Alor l'homme (la race dimoune) ena le devoir pou préserve sa don là, pou protége li et pou reste loin avec tout kitchoses ki pou capave fer li-même ditort, c'est-à-dire, sa lécorps et aussi sa l'âme ki Allah fine donne li. Mais du moment ki l'homme mette de côté et ignore tous sa bane réalités (sa bane vérités) là, alor l'existence de l'homme lor la terre vine ene nannié du tout et pas même represente aucaine valeur dans so propre lizié. L'homme pas réalise sa bane faveurs ki Allah fine donne li là. Et li considère li-même alor comme ene créature ki pareil couma les autres, ene tel créature ki ena ene commencement et ene la fin. C'est tout. Sa façon de penser là li la cause principale de la perte de milliers, pour pas dire millions, de la vie humaine. Commié peuples ki fine exterminé depuis le premier (groupe de bane dimounes) ziska dernier (groupe de bane dimounes) sans ene raison valable? Crime fine vine ene fléau ki pé gagne de plus en plus de l'ampleur de zour en zour. Pas ena ene sel moment ki passé sans ki nous apprane ki ene crime fine commette kit-part. Pourtant, bane raisons ki justifier bane homicides zot bien banales: Par exemple, bien souvent la guerre levé selman à cause ene cigarette, ou sois ene ti somme l'argent, la jalousie, ene z'histoire d'amour ki fine mal tournée, etc. Pourtant Allah fine catégoriquement interdit pou pran la vie d'ene dimoune. **« Pas tire la vie ki Allah fine rende sacré, excepté par la justice. Pou celui ki gagne touyé injustement, Nous fine donne so héritier l'autorité (pou dimane dommage). Mais faudré pas ki li exagérer, kan ena ene meurtre, parski li pou gagne aide. »** (Al-Isra 17: 34).

En plisse de bane massacres et de bane crimes, ene l'autre fléau ki pé prend de plus en plus l'ampleur de nos jours, c'est suicide. Sa zaffaire ki ene dimoune li touye li-même avec so propre la main li ene zaffaire extrêmement grave et ene péché ki Allah, le Créateur fine interdit. **« Et pas touye zot-même (ou pas touye zot entre zot-même). Allah vraiment ena pitié pou ou. »** (An-Nisa 4: 30). Si Allah fine donne nous sa la vie là, alor kifaire nous bizin débarrasse nous de sa ? Saki pé passé de nos jours li bien chagrinant, et bien bien terrible, surtout parmi bane jeunes. Zot pé perdi zot la vie pour bane diverse raisons ki bien banale. Par exemple couma: échec dans bane l'examens, difficulté pou trouve travail, ene déception amoureuse, ene dispute avec bane parents etc. Zot penser ki seul solution à zot bane problèmes c'est pou touye zot-même (suicider). Le suicide c'est ene péché ki so bane conséquences pou bien lourd pour sa dimoune ki fine suicidé là, le jour de le Résurrection. Abu Hurayra rapporté ki Rassoollullah (saws) fine dire : *« Celui ki touye li-même en tranchant li-même avec ene zaffaire pointu (avec ene boute féraïlle), li pou reste attrape sa l'objet là et touye li-même éternellement dans difé l'enfer. Celui ki suicide li avec poison, pou reste pran poison et avale sa éternellement dans difé l'enfer. Celui ki zette li-même depuis (hauteur) ene montagne, pou reste fer sa action là éternellement dans difé l'enfer. »* (Muslim).

Sa punition bien dure là montré clairement ki ene dimoune ki suicide li pas pou ena aucaine repos dans l'au-delà. Si le désespoir fine entraîne li dans ene telle situation, eh bien c'est kitchose pli pire ki sa ki pé attane li là-bas. Ki sakaine d'entre nous, musulman, aussi bien ki bane non-musulman, faire ene bon réflexion lor sa zaffaire là afin pou compran vraie valeur de nous la vie. Anou pran soin de sa don divine là, matin et soir. Anou respecter la vie de bane les autres. C'est à nous maintenant pou médite lor parole d'Allah : **« C'est pourquoi Nous fine prescrire pou peuple Israël ki, si ene dimoune touye ene l'autre, sans ki ena ene premier crime pou venger, ou ene malfaiteur lor la terre pou puni, li pou pareil couma dire li fine touye toute l'humanité. Et si li sauve ene la vie, c'est comme-ci li fine sauve toute la communauté. »** (Al-Maida 5: 33).

C'est Allah ki fine donne nous la vie et c'est zis Li ki ena tout l'autorité pou répran sa la vie n'importe kan Li oulé. Faudé pas zot précipite zot la mort en mettant fin à zot la vie lor la terre. Zamais désespérer dans la vie, parski désespoir c'est travail Shaytane et de bane ki pas reconnaite zot Créateur. Place zot confiance dans Allah parski **« Après sak difficulté, ena ene facilité ! »** (As-Sharh 94: 6-7).

Colère, jalousie et rancune zot bane mauvais conseillers pou l'homme. Zot bizin apprane maîtrise tous sa là et pardonne à bane ki fine offense zot. Zot bizin satisfait avec zot la vie, quelle que soit zot situation. Ki Allah répanne So pitié lor nous et pardonne nous! *Ameen.*